

Dithero tsa Tirelano mo Kutlwanong

Thero ka letstsi la ntlha la ngwaga o mošwa, e le ka 01. 01. 2012 06/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 79 - 74/77
2. **Thapelo:** *Morena Jesu Keresete, Morepholosi, re a go leboga, ka o sa ntse o re letlelela go simolola ngwaga o mošwa ka bopelotlhomogi jwa gago. Ke gona re go kopang gore o nne le rona le mo go ona, o re tiise ka Lefoko le disakaramente tsa gago, re tle re tlhomame mo tseleng ya rona le monongwaga, ka fa tsholofetsong ya gago e e reng: O tla nna le rona ka malatsi otlhe go ya mo bofelong jwa lefatshe. Dira jalo, Morena wa rona, ka bopelotlhomogi jwa gago. Amen.*
3. Epistolo ka fa thulaganyong ya 2 e kwadilwe mo go Jakobo 4:13-15;
4. Efangele ka fa thulaganyong ya 1 e kwadilwe mo go Luka 2:21.
5. A go ipolelwe tumelo ya bokeresete_
6. Sefela sa 77 - 72/75
7. Thapelo ya mmadi wa thero.
8. **Lefoko** ka fa thulaganyong ya 4 le kwadilwe mo go Jošua 1:1-9, le re: _Morago ga loso lwa ga Moše motlhanka wa MORENA, MORENA a raya Jošua morwa Nune, modiredi wa ga Moše, a re: 'Moše, motlhanka wa me o sule. Jaanong tloga o tshele noka e ya Joretane wena le morafe otlhe o, lo tsene mo lefatsheng le ke le nayang bone Baiseraele. Felo gongwe le gongwe kwa dipato tsa dinao tsa lona di tla gatang teng ke go lo neile jaaka ke boleletse Moše. Go tloga kwa sekakeng le kwa Lebanone go ya go fitlha kwa nokeng e kgolo, e bong ya Ferathe - lefatshe lotlhe la Bahethe - le go fitlha kwa lewatleng le legolo le le kwa bophirimatsatsi, e tla nna naga ya lona. Ga go na ope yo o tla kgonang go emelana nao ka malatsi otlhe a botshelo jwa gago. Ke tla nna nao jaaka ke ne ke na le Moše. Ga nkitla ke go nyemisa moko le e seng go go tlogela. Tia o nne pelokgale; gonne lefatshe le ke le ikanetseng borraabo go le ba naya, wena o tla le abela morafe o go nna boswa jwa ona. Fela o tie, o nne pelokgale thata go ela tlhoko gore o dire ka fa molaong otlhe o Moše, motlhanka wa me, a o go laetseng. Se o fapoge mo ntlheng ya le le jang, le e seng mo go ya la molema gore tiro ya gago e tswelele pele sentle gongwe le gongwe kwa o tla yang teng. A lokwalo lo lwa molao lo se tloge mo molomong wa gago, o lo akanye bosigo le motshegare gore o ele tlhoko go dira tsotlhe ka fa di kwadilweng ka teng mo go lone; gonne foo o tla tlhogonolofala mo ditseleng tsa gago; foo o tla tswelela pele sentle. Kana ke go laetse ka re: Tia o nne pelokgale_ Ka moo se rerege, o se kgobege marapo. Gonne MORENA, Modimo wa gago, o na nao gongwe le gongwe kwa o tla yang teng.'_ Amen.

Thero: Barategi mo Moreneng wa rona Jesu Keresete, kajeno re simolola ngwaga o mošwa. Modimo o kutlwelobotlhoko le rona, o sa ntse wa re naya phatlha le ka monongwaga, mme o rata gore re tlhomame, re dire fela ka fa Lefokong la one. Re rutwa ka Baiseraele ba ba neng ba ntshiwa mo lefatsheng la bokgoba, ba fiwa lefatshe la tsholofetso, e bong Kanana. Le fa go ntse jalo, ba ne ba tshwenya Modimo ka go fapaana mo tseleng ya ona, ba kgarakgatshega sekaka dinyaga tse di 40, ba sa kgona go goroga mo lefatsheng la tsholofetso ka ntlha ya diphapogo tsa bone. Mme ka bopelotlhomogi jwa Modimo ba fetsa ka go ja lefatshe le le solofeditsweng borraabo bagolo boswa, mme o ka re: Modimo o ne wa itshoka fela, ba boela mo molaong wa bone ka go kaelwa ke Jošua, a tiisiwa ke Morena. Morago ga dirafala ka baporofeti ba ba ba tsoseleditseng ka go ba busetsa mo Modimong gore ba bone boitshwarelo mo go ona. Fela jalo le rona re gopodiwa maleo a rona a re a dirileng ngogola gore re kgaogane le ona, re tsene mo go 2012 re tiie, re eme ka bopelokgale, le rona re re: Morena o nna le rona le mo go ona o mošwa o ka fa thutong ya kajeno e e reng: Tia, o nne bopelokgale_

- ka go sa fapoge mo molaong wa Morena;
- ka go akanya ka ga ona bosigo le motshegare;
- ka go dira gore batho bao ba je lefatshe boswa.

Tia, o nne bopelokgale **ka go sa fapoge mo molaong wa Morena_** Re a utlwa, ga twe: Baiseraele ba ne ba latlha Modimo, ba o fularela gantsi, ba itsenya mo ditlalelong, le mo dipitlaganong ka bobone. Ka go kaelwa ke batlhanka ba Modimo ba ba ba rapeletseng, ba ne ba tlhabologa. Ke fa Modimo o ne wa ba itshwarela ka bopelotlhomogi. Ke se re se bonang ka tsamao ya bone mo sekakeng. E rile Moše a sena go tlhokafala, Modimo o ba solofeditse bopelotlhomogi jwa ona sešwa ka Jošua gore ene o tla ba gorosa mo lefatsheng la tsholofetso, fa ba sa fapoge mo molaong wa bone. Tota ke fa ba ne ba tsena mo lefatsheng la tsholofetso, ba le ja boswa. Jošua a ba kaela, a ba ruta, a re: _Jaanong he, boifang MORENA, lo mo direle ka nnete le ka boikanyego_ Tlosang medimo e borraeno ba neng ba e direla kwa moseja ga noka ya Ferathe le kwa Egepeto, lo direle MORENA. Mme fa e le bosula mo matlhong a lona go direla MORENA, itlhopheleng kajeno yo lo ratang go mo direla, a medimo e borraeno ba neng ba e direla ba le kwa moseja ga noka ya Ferathe kampo medimo ya Baamori ba lo agileng mo lefatsheng la bone, mme nna le ba lapa la me re tla direla MORENA. Ke fa morafe o araba o re: 'A go nne kgakala le rona go ka tlogela MORENA le go ka direla medimo e sele.' Jošua a ba a kwala mafoko ao mo lokwalong lwa molao wa Modimo, a ba a tsaya letlapa le legolo, a le tlhoma teng,_ Još. 24, 14-16. 26.

Rona re reng? Re tla dirang mo ngwageng o re o simololang? Re ikemisetsa go dirang monongwaga? A re tlogeleng maleo, mafufegelo, dikilano, ditlhoano, botshwakga, re lebelele molao wa Morena, re se fapoge mo go ona_ Ona o a reng? O a re: Rata Modimo bogolo go tsotlhe,

o rate mongwa-ka-wena, jaaka o ithata. A re fitlheng tlhoano le mafufa a ngogola_ A re sweng mmogo le ona_ Rona badumedi, a re tseneng mo ngwageng o mošwa re itshekile, re ikemisetse go dira ka fa molaong wa Modimo, jaaka Baiseraele ba ne ba tlogela kwa moseja ga noka le kwa Egepeto tse di diretsweng ke borraabo. A le rona ba kajeno re direng jalo, le rona re reetse, re utlwe tse di bolelwang ke Lefoko_

A re tieng, re nne bopelokgale **ka go akanya ka ga molao wa Modimo bosigo le motshegare_** Jošua o ne a kaelwa gore a ele tlhoko, a dire ka fa molaong otlhe o a laetsweng ke Moše ka ona gore a tsamaye ka fa ona gore tsotlhe di tswelele pele sentle mo ditseleng tsotlhe tsa gagwe. Ga dirafala jalo. Le rona kajeno re kaelwa gore re dire jalo. A re direng jalo, re akanye ka ga molao wa Modimo bosigo le motshegare, re o dire. Ke fa re tla nna le tswelelo-pele monongwaga. Ke raya molao o mošwa wa Mowa, o o reng: A re rapeleng mo Moreneng, re ipolele maleo a rona, re tlhabologe mo bosuleng jwa rona ka malatsi otlhe, re atamele mo boipobolong le mo selalelong se se boitshepo, gonne kaelo ya Morena e re: Dirang jalo ka metlha gore lo nkgopole_ Go mo gopola go dirafala mo selalelong sa gagwe. A re direng jalo ka boitumelo, le ka tebogo_ Modumedi, a ko o tlhajwe ke ditlhong ka tse o di dirileng ngogola, ka go kgaogana le Morena, ke raya ka go atamela gangwe, gongwe gabedi, gongwe gararo fela, o ne o sa ye mo kerekeng, le e seng mo selalalong, o sa thibelwa ke sepe, o sa baakanya se se neng sa go thibela. Go maswe, ga go a siama. O ne wa fapoga mo kaelong ya ga Jesu. Monongwaga, a o ko o nne sekao se sentle mo phuthegong ya lona, o nne lokwalo lo lo balwang, o nne boitumelo mo go ene yo o lo balang, a lo bona. Gopola ditaolo tse di lesome tse di filweng mo thabeng ya Sinai, o akanye ka tsona. Ke re: O tla lemoga, fa o di tlodile gantsi. Ka moo o be o tshabele mo molaong wa Mowa wa botshelo o o mo go Keresete Jesu, gonne ene o go golola mo molaong wa boleo le loso. A Morena a re thuse gore re dire jalo, re tle re kgone go tsamaya mo tseleng ya rona e e yang kwa lefatsheng la tsholofetso le le mo legodimong.

Tia, o nne bopelokgale **ka go dira gore batho bao ba je lefatshe la tsholofetso boswa_** Jošua o ne a laelwa jalo. E ne e le tshwanelo gore a tie gore batho ba kgone go tsena mo lefatsheng la tsholofetso. Le rona re kaelwa fela jalo gore batho ba kgone go tsena mo lefatsheng la tsholofetso, e bong mo legaeng le le mo legodimong. Badumedi, a re tieng monongwaga, o ka re ka go feta ngogola. Moruti, tia, o nne bopelokgale jaaka morwa-Nune yole, o itse gore o tshwere tiro e e bokete ya go disa batho. Ka moo thusa, o se fapose mewa ya bone, mme o ba tiise gore ba se ka ba tlhola ba boifa go tshwara tota tse ba di baakanyeditsweng ke Keresete. A re boifeng ka ntlha ya selo se se maswe se se dirang gore ba bangwe ba latlhegelwe ke tse ba di solofeditsweng ke Morena Jesu. Tota go makatsa go bona moruti, fa a fosa, fa a sa tlhole a gopola molao wa Modimo, a sa tlhole a gopola ikano e a e ikanneng ka letsatsi la tlhomamiso ya gagwe, a sa tlhole a gopola

dikaelo tsa motlhanka wa Modimo, e bong bišopo yo o mo tsentseng mo tirong. Mo boemong jwa go dira jalo, o tswela go tshwara batho gore ba mo sale morago mo diphapogong tsa gagwe. Jaaka ga dirafala ka Jošua le Moše, ke tshwanelo gore go dirafale ka rona le bišopo, gonne dikaelo tse a re kaetseng ka tsona ga di tswe mo go ene, mme di tswa mo go Keresete Morena wa rona rotlhe. O ele tlhoko gore o dire tsotlhe tse motlhanka wa me, e bong Moše a go laetseng ka tsona_

A re direng jalo monongwaga jaaka Jošua, wena rra, wena mma, wena ngwanaaka, o tiisiwe_ O ruta jang ka tsamao le botshelo jwa gago? A Morena a go thuse mo ikanong ya gago, o itumele, gonne Morena o solofeditse go nna le rona, le fa ka nako efe, le fa mo felong gofe kwa re yang teng. Amen.

Thapelo: Morena, a o ko o re thuse gore re gopole Lefoko la gago, re ipofe ka lona, re tsamaye ka fa lona monongwaga ka bopelotlhomogi jo bogolo jwa gago. Amen. Thapelo ya Morena: Rara wa rona yo o mo legodimong ...

9. Sefela sa 76 - 71/74

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke Aaron Ntuli +, ka ngwaga wa 1993/2005

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.